

Na osnovu člana 16. stav 1. i člana 17. stav 1. Zakona o Vladi Hercegovačko-neretvanskog kantona ("Službene novine HNK", broj: 3/07 i 5/09), člana 26. stav 1. i člana 34. stav 1. Zakona o javno-privatnom partnerstvu ("Službene novine HNK" broj: 2/13) na prijedlog Agencije za privatizaciju Hercegovačko-neretvanskog kantona, Vlada Hercegovačko-neretvanskog kantona je na 62. sjednici, održanoj 15.5.2014. godine donijela:

## **UREDBU**

### **O NADZORU PROVEDBE PROJEKATA JAVNO-PRIVATNOG PARTNERSTVA**

#### **I. OPŠTE ODREDBE**

##### **Član 1.**

(Predmet Uredbe)

Ovom Uredbom uređuju se ovlasti Agencije za privatizaciju (u daljnjem tekstu: Agencija) u obavljanju nadzora provedbe projekata javno-privatnog partnerstva (u daljnjem tekstu: projekata JPP-a), način postupanja prilikom nadzora provedbe projekata JPP-a, te prava i obaveze ugovornih strana u postupku nadzora provedbe projekata JPP-a.

##### **Član 2.**

(Pravo nadzora resornog ministarstva odnosno službi lokalne samouprave)

Nadležnost Agencije za obavljanje nadzora provedbe projekata JPP-a ne isključuje pravo drugih državnih tijela da nadziru provedbu projekata JPP-a, sukladno posebnim propisima.

##### **Član 3.**

(Projekti JPP-a nad kojima se vrši nadzor)

(1) Agencija provodi nadzor u svrhu praćenja provedbe projekata JPP-a i unaprjeđenja izvršavanja ugovorenih obaveza javnog i privatnog partnera u provedbi projekata JPP-a.

(2) Nadzor se provodi nad svim projektima JPP-a, čija provedba je započela sklapanjem Ugovora o javno-privatnom partnerstvu, ili osnivanjem zajedničkog privrednog društva, u skladu sa odgovarajućim odredbama Zakona o javno-privatnom partnerstvu (u daljnjem tekstu: Zakona o JPP-u), kao i na projekte čija je provedba započela prije dana stupanja Zakona o JPP-u.

## **Član 4.**

(Način praćenja projekata JPP-a)

(1) U provođenju nadzora, Agencija ima pravo praćenja provedbe projekata JPP-a, te stručnog uvida u provedbu projekata JPP-a.

(2) Agencija prati provedbu projekata JPP-a prvenstveno uvidom u izvještaj o provedbi projekta, te uvidom u dokumentaciju u svezi s provedbom projekta, u skladu sa odredbama članova 6. i 8. ove Uredbe.

(3) Stručni uvid u provedbu projekata JPP-a, Agencija provodi na mjestu provedbe projekta, na način uređen ovom Uredbom.

## **Član 5.**

(Period provođenja nadzora nad projektima JPP-a)

Agencija provodi nadzor tokom cijelog trajanja provedbe projekata JPP-a.

## **II. PRAĆENJE PROVEDBE PROJEKATA JPP-A**

### **Član 6.**

(Dostavljanje izvještaja)

(1) Javni partner dužan je u roku od šest (6) mjeseci od dana sklapanja Ugovora o javno-privatnom partnerstvu, odnosno osnivanja zajedničkog privrednog društva s privatnim partnerom, Agenciji na uvid dostaviti, Izvještaj o provedbi projekata JPP-a (dalje u tekstu: Izvještaj), koji mora biti potpisan i ovjeren službenim pečatom od strane javnog i privatnog partnera.

(2) Izvještaj se dostavlja popunjavanjem obrasca koji je sastavni dio ove Uredbe.

(3) Javni partner Izvještaj dostavlja svaki šest (6) mjeseci.

(4) Posljednji Izvještaj dostavlja se najkasnije u roku od šest (6) mjeseci od zadnjeg dana isteka ugovorenog vremena provedbe projekata JPP-a.

(5) Ukoliko Izvještaj ne bude dostavljen u traženom roku, Agencija će pisanim putem zatražiti dostavu Izvještaja, koji mora biti dostavljen u roku od 30 dana od dana primitka pisanog naloga.

(6) Agencija na osnovu primljenog Izvještaja može tražiti dodatna objašnjenja, obrazloženja i očitovanja ugovornih strana u vezi s pojedinim navodima iz Izvještaja, te može tražiti na uvid i drugu dokumentaciju, u skladu sa odredbama člana 8. ove Uredbe.

### **Član 7.**

(Način popunjavanja i dostave obrasca za dostavu izvještaja)

(1) Obrazac za dostavu Izvještaja mora se ispuniti čitko, hemijskom olovkom ili pisačom mašinom, odnosno kompjuteru, pojedinačno za svaki Ugovor o javno-privatnom partnerstvu.

(2) Ispunjen obrazac za dostavu Izvještaja podnosi se kao preporučena pošiljka s povratnicom ili lično na protokol Agencije.

### **Član 8.**

(Dostavljanje dokumentacije)

(1) U svrhu obavljanja nadzora, Agencija može od ugovornih strana u bilo kojem trenutku zatražiti dostavu dokumentacije iz člana 26. Zakona o javno-privatnom partnerstvu, koja se odnosi na provedbu projekata JPP-a.

(2) Ugovorne strane dužne su u roku od trideset (30) dana od dana primitka zahtjeva iz stava 1. ovoga člana, Agenciji dostaviti tražene dokumente.

(3) Pošto primi dokumentaciju iz stava 1. ovoga člana, Agencija može zatražiti dodatna objašnjenja, obrazloženja i očitovanja ugovornih strana i/ili obaviti neposredni stručni uvid.

## **III. STRUČNI UVID**

### **Član 9.**

(Neposredan stručni uvid i zapisnik o neposrednom stručnom uvidu)

(1) Agencija ili osoba koju Agencija ovlasti, u svrhu provjere navoda iz primljenog Izvještaja iz člana 7. ove Uredbe i dokumentacije iz člana 8. ove Uredbe može obaviti neposredni stručni uvid (u daljnjem tekstu: uvid) na mjestu provedbe projekata JPP-a.

(2) Na osnovu izvršenog uvida, Agencija sastavlja zapisnik.

(3) Zapisnik obavezno mora sadržavati podatke o projektu nad kojim je proveden uvid, o ugovornim stranama, vremenu provođenja uvida, razlogu i načinu provođenja uvida,

dokumentaciji na osnovu koje je proveden uvid, uočenim nepravilnostima, te podatke o osobi koja je provela uvid, a po potrebi može sadržavati i druge podatke.

#### IV. OBAVIJEST I PREPORUKA O OTKLANJANJU NEPRAVILNOSTI

##### **Član 10.**

(Obavijesti o uočenim nepravilnostima i preporuke o načinu otklanjanja nepravilnosti)

(1) Ukoliko na osnovu provedenog nadzora, Agencija uoči nepravilnosti u provedbi projekata JPP-a, Agencija o tome pisanim putem obavještava javnog i privatnog partnera.

(2) Obavijest o uočenim nepravilnostima sadrži i preporuke o načinu otklanjanja uočenih nepravilnosti.

(3) Ugovorne strane su obvezne, najkasnije u roku od petnaest (15) dana od dana primitka preporuke iz stava 2. ovoga člana, izvijestiti Agenciju o aktivnostima poduzetim u svrhu otklanjanja uočenih nepravilnosti.

(4) Nepravilnostima iz stava 1. ovoga člana podrazumijevaju se sva odstupanja od ugovorenih prava i obaveza javnog i privatnog partnera, do kojih je došlo u provedbi projekata JPP-a, a koja ugovorom o javno-privatnom partnerstvu nisu predviđena.

(5) Agencija će o uočenim nepravilnostima obavijestiti druga nadležna državna tijela.

#### V ZAVRŠNE ODREDBE

##### **Član 11.**

(Stupanje na snagu Uredbe)

Ova Uredba stupa na snagu osmog dana od dana objavljivanja u "Službenim novinama Hercegovačko-neretvanskog kantona".

Bosna i Hercegovina  
Federacija Bosne i Hercegovine  
HERCEGOVAČKO-NERETVANSKI KANTON  
V L A D A

Broj: 01-1-02-824/14  
Mostar, 15.5.2014. godine

OBRAZAC ZA DOSTAVU IZVJEŠTAJA O PROVEDBI PROJEKATA JPP-A

u vezi s članovima 6. i 7. Uredbe o nadzoru provedbe projekata JPP-a

1. PREDMET I NAZIV UGOVORA/ PROJEKTA JPP-a		/
2. JAVNI PARTNER (naziv, adresa, matični broj, identifikacioni broj)		/
3. PRIVATNI PARTNER (naziv, adresa, matični broj, identifikacioni broj)		/
4. DUŽINA TRAJANJA UGOVORA		/
5. DA LI JAVNI PARTNER PLAĆA IZNOS UGOVORENE NAKNADE (ukoliko je naknada ugovorena; period od 6 mjeseci)	DA	NE (pojasniti razloge)
6. DA LI JAVNI PARTNER IZVRŠAVA DRUGE UGOVORENE OBAVEZE (period od 6 mjeseci)	DA	NE (pojasniti koje, razloge, te poduzete mjere)
7. DA LI JE PRIVATNI PARTNER PRUŽAO UGOVORENI STANDARD KVALITETE USLUGE (period od 6 mjeseci)	DA	NE (pojasniti razloge)
8. DA LI PRIVATNI PARTNER IZVRŠAVA DRUGE UGOVORENE OBAVEZE (period od 6 mjeseci)	DA	NE (pojasniti koje, razloge, te poduzete mjere)

9. DA LI POSTOJI SPOR (period od 6 mjeseci)	DA (pojasniti razloge)	NE
10. AKO POSTOJI SPOR, DA LI JE POKRENUT POSTUPAK RJEŠAVANJA SPORA	DA (pojasniti trenutni status rješavanja spora)	NE (pojasniti razloge)
11. DA LI POSTOJI PLAĆANJE UGOVORENIH KAZNI ILI UMANJENJE UGOVORENIH NAKNADA ZBOG NEIZVRŠENJA UGOVORENIH OBAVEZA	DA (pojasniti razloge plaćanja ugovorenih kazni i trenutni status)	NE
12. OSTALE NAPOMENE		

JAVNI PARTNER:

-----

\_\_\_\_\_

(PEČAT)

-----

PRIVATNI PARTNER:

\_\_\_\_\_

-----

\_\_\_\_\_

(PEČAT)